



INTRODUCZIUN

DA RAMONA CASANOVA-BAUMGARTNER

Tier fiastas eis ei magari aschia ch'ils envidai portan sezs ina spisa per il buffet. Ed alla fin vonza pil pli ina pulita purziun.

Mo co ei quei stau cun la spisgentada dils 5000 che vevan fom? Ei tut vegniu mo dils tschun pauns e dils dus pèschs? Ha forse il mattatsch intimau auters dad era contribuir il lur? Ni ha veramein l'oraziun da Jesus fatg daventar nundumbreivels ils pauns e pèschs?

Igl ei pli segir da ver ina reserva e prender igl emprem quei che vegn fatg amogna. Quei ei pli emperneivel e quietont. Mo Jesus dat ina viulta a quei secuntener. Ils fomentai vesan igl exempel da Jesus. Cheutras semida l'atmosfera, ils carstgauns sezs semidan. L'enzenna dalla spisgentada dils 5000 ei in'enzenna che arva ils cors.

En Tiara sontga dat ei a Tabgha ina baselgia dalla multiplicaziun dils pauns. In mosaic illustrescha la spisgentada dils 5000. Denton vesan ins denter ils dus pèschs mo quater pauns, enstagl da tschun pauns. Forse ston ins dir: Sche ti vul capir e tschaffar l'enzenna dalla multiplicaziun dils pauns, ston ti sezs metter vitier in paun.

EVANGELI

Gn 6,1–15

¹Silsuenter ei Jesus ius vi sin l'otra riva dalla mar da Galilea ni da Tiberias. ²Ina gronda fuola suandava el, per quei ch'ei vesevan las enzennas ch'el fageva culs malsauns. ³Mo Jesus ei ius sil cuolm e sesius leu cun ses giuvnals. ⁴Pastgas, la fiasta dils Gadius, fuvà damaneivel. ⁵Alzond l'egliada, ha Jesus viu che bia glied vegneva tier el. Ed el ha detg a Filip: Nua lein cumprar paun, per che quels hagien da magliar? ⁶Quei ha el detg per metter Filip sill'emprova; el sez saveva numnadamein, tgei ch'el leva far. ⁷Filip ha rispundiu: Paun per duatschien denars tonscha buc, per che mintgin survegni era mo ina buccada. ⁸In da ses giuvnals, Andriu, il frar da Simon Pieder, ha detg ad el: ⁹Cheu ei in mattatsch che ha tschun pauns dumiec e dus pèschs; mo tgei ei quei per tons! ¹⁰Jesus ha detg: Fagei seser la glied! En quei liug fuvà ei bia pastg. Els ein pia sesi, entuorn tschunmelli umens. ¹¹Lu ha Jesus priu ils pauns, ha plidau igl engraziament e distribuì a quels che sesevan, medemamein era ils pèschs, ton sco ei han vuliu. ¹²Cura ch'els han giu avunda, ha el detg a ses giuvnals: Rimnei las vanzadiras, per che nuot mondi en mal! ¹³Els han rimnau ed empleniu dudisch canasters cun las buccadas dils tschun pauns dumiec che la glied veva schau vanzar. ¹⁴Vesend l'enzenna che Jesus veva fatg, scheva la glied: Quei ei pilver il profet che duei vegnir sil mund. ¹⁵Cheu ha Jesus encurschiu ch'ei levan vegnir e far el retg culla forza. Per quei eis el puspei seretratgs sin il cuolm, el tut persuls.